



Předsydkka Serbskeho šulskeho towarstwa (SŠT) Ludmila Budarjowa, zapóštanc Sakskeho krajneho sejma Alojs Mikławš a sakski minister za ratarstwo a wobswět Frank Kupfer (wobaj CDU) kaž tež pěstowarske džěci scěhuja wuwjedženja architekta Marka Dźisławka (na lěwym wobrazu wotlěwa). Minister Frank Kupfer, Alojs Mikławš, přěnja přirjadnica Budyskeho wokrjesa Birgit Weber a wjesnjano Maćij Brycka (CDU, wotprawa) při symboliskim přěnim zarywje Foće: M. Wjeńka

## Wulkeje wody so bojeć njetrjebaja

### Džensa přěni zaryw za nowu Chróšćansku pěstowarnju

Chróšćicy (SN/MWj). Štož chcedža w Njebjelčicach nazymu zdokonjane měć, su nětko w Chróšćicach zahajili, mjenujcy nowu pěstowarnju twarić. Za nju bě džensa symboliski přěni zaryw. Na tónle „wulki swjedžen“, kaž to wjesnjano Maćij Brycka mjenowaše, witaše wón mjez druhim sakskeho ministra za ratarstwo a wobswět Franka Kupfera. Předewšěm pak džakowaše so zapóštanc Sakskeho krajneho sejma Alojsej Mikławškej (wšitcy CDU), kiž je wjele terminow a rozmołwow mjez gmejnu a přislušnymi městnami sakskeho knježerstwa spo-

sředkował a ma tak sobu najwjetše zaslužby na tym, zo móža w Chróšćicach nowe džěćace dnjowe přebywanišće twarić. Jim a tójšto přichwatany wjesnjanam předstajichu chowancy pěstowarnje dwurěčny program.

Kubłanišće z 25 žobikowymi a 45 pěstowarskimi městnami nastanje bjezposrědnje pódla wjaceměrweje hale „Jednota“ na najwysim dypku wsy, hdžež njetrjebaja so hižo wulkeje wody bojeć. Architekt Marko Dźisławk nowotwar rozloži. Po jeho słowach woprijima projekt štyri jednotliwe twarjenja, kotrež su mjez

sobu zwjazane. Wšitke skupinske rumnosće budu w přizemju, runje tak kaž dalše rumnosće za wosebite zaběry. Za nowym mjenom kubłanišća dyrbja nětko džěći, starši, gmejna a SŠT zhromadnje pytać.

Projekt plaći 1,4 milionu eurow. Přizwolene maja dotal 627000 eurow, kotrež by gmejna za saněrowanje stareje pěstowarnje dóstała. Dokelž pak so plěšniwca dla saněrować njehodži, je nowotwar woprawnjeny. Frank Kupfer je optimistiski, zo tež zbywace pjenjezy ze spěchowanskeho programa za wotstrojenje škodow po wulkej wodze dóstanu.